

No tin hopi fondo publico pero si suficiente pa atende cu cultura

ORANJESTAD – “Si... y si”, esaki tabata e contesta cu minister Oduber a duna riba e pregunta cu si tin fondo special disponibel destina pa e maneho di cultural nobo. “Si tin hopi fondo publico, no. Pero mi ta kere cu tin suficiente pa nos por haci hopi”, el a bisa.

Un maneho nobo riba cultura a keda introduci diaranson ultimo cu e presentacion oficial di e documento “Excelencia Cultural”. E rapport aki ta describi 12 prioridad cu e partnernan di e sector cultural y di enseñansa ta bay traha durante e proximo dos aña.

Fondonan y transparencia

El a indica cu gobierno riba su mes cu e poco fondonan cu tin ariba disposicion pa atende cu e responsabilidad cu e veld di cultura, nan por haci esaki mas eficiente y cu un productividad hopi mas halto.

E prome “si” –segun e mandatario– tin di haber cu bo mester identifica bo mes cu sector priva, como miembro di e veld cultural na Aruba. E ta haya cu e sector aki ta brinda hopi posibilidad cu no necesariamente gobierno tin cu facilita e parti financiero pa proyectonan cultural. Den e caso aki e mesun ministerio por facilita guia pa e artista lo por realisa su proyecto.

Ademas di e dos comision cu a wordo instala riba implementacion di cultura den educacion, y otro comision encarga riba documentacion y digitalisacion, tin fundacionnan cu ta duna apoyo financiero na cultura.

El a menciona cu UNOCA cu ta un di nan, y e ta un fundacion importante actualmente pa concretisa e maneho aki. Tambe lo tin e fundacion cu lo ta encarga cu tur e museonan (FMA), caminda tur dos fundacion lo mester opera pa fin di october conforme cu e codigonan di bon gobernacion.

“Nos ta implementando loke empresanan grandi cu ta pone un base di transparencia asina importante den nan organisacion”, el a bisa. E base aki –segun e mandatario– nan ta implementando den organisacion of fundacion cu gobierno ta sostene. E ta considera cu transparen-

cia ta un aspecto importante pa e maneho cu lo kier trece dilanti. Di e forma aki sector priva cu lo kier tin confianza den e fundacionnan aki. Asina nan lo por ta un partner di nan y forma parti di e desaroyo cu tin ariba e veld cultural cu tin na Aruba. E ta spera cu den futuro tanto e fundacionnan aki como sector priva lo por logra mas cu por opera a base di e bon gobernacion.

Fondonan internacional

Otro fuente di financiamiento pa logra e meta di e maneho di excelencia cultural ta e institucionan internacional cu ta subsidia proyectonan riba e veld aki.

Segun e mandatario, mas serio y structura bo organizacion ta, e posibilidad t’ey cu nan por yega na remarca di e fondonan cu ta existi tanto local como internacional pa duna sosten. El a cita como ehempel e expresion di arte den espacio publico cu ta un

combinacion di fondonan local y internacional den e caso aki di Hulanda.

Tambe e mandatario a bisa cu e di dos “si” tocante disponibilidad di fondonan tin di haber cu gobierno si a percursa pa e cambio cu lo tuma luga pa profesionalisa mas y mas e institucionan.

Nan lo percursa cu dor di e profesionalisacion ey nan lo percursa pa genera fondonan adicional dor di un FMA (Fundacion Museo Aruba)

cu ta bay haya fondo via APA N.V. Tambe tin otro fundacionnan cu ta bin haya ayudo di Oficina di Turismo (ATA) cu ta mira e direccion cu cultura ta wordo encamina. Tambe Triple A (Aeropuerto), companianan di utilidad y gobierno riba su mes ta percursa pa tin fondo disponibel pa e veld di cultura.

Na final, minister Oduber a laga sa cu nan buscando un harmonisacion entre gobierno y tur institucionan. □